

# SAN PABLO CARTA FILIPOS CHJAMBTEWE'SH JÏI

---

**Pablo carcelte ũsrra Filipos chjambte yacjtjē'jty fi'jni**

**1** <sup>1</sup>Jesucristo's selpisáa Pablo vite' Timoteo cue'shtja'w naa carta's fi'jrra caja' Dyus luuch Cristo Jesus yacj fi'nzesawe'shtyi, Filipos chjambte ũssa yacjtjē'ljwe'sh vite' dyuus yatte jycaajsawe'sh vite' cytee mjïi pu'chsa jyucaysaty wechana. <sup>2</sup>I'cue'shtyi' Dyusa' pu'chjina vite' cue'shtyi jype'jsa Jesucristova, tyāa pa'ga Dyus yacjrráa mfi'nzewe.

**Dyus yacj fi'nzesawe'sh pa'gate Pablo Dyus yacj puuty we'weni**

<sup>3</sup>Bagachteva i'cue'shtyi yaacy iisatj Dyusa's wecha'. <sup>4</sup>Sa' i'cue'sh jyucaysa pa'gate bagachteva wala wechana Dyus yacj puuty we'we'tj. <sup>5</sup>Tyāa pa'gatey ja'ndarraj mjïisatja'w Dyus yuwe's pta'shna nyafiitey tacjrra āchpcach. <sup>6</sup>Atsa' na'wē i'cue'sh ew fi'nzewa'ja's Dyusa' i'cue'shtyi pu'chya' tacjcu na' Jesucristo naa quiwete shawendna quïjpcach pu'chna nes yuuna tyā'wē yūuwa'ja's ew jii'tj. <sup>7</sup>Andya' Dyus yuwe's pta'shpa'garráa āchja' carcelte ũstju. Nava cjuēs tashte pa'yama'ty pējyya' nava Dyus yuwe ewsa yuja' jīna pta'shna nes yu'nja, tyā'wēy i'cue'shva tuutje'lj pu'chna ũsi'cue. Tyāa pa'ga andya' i'cue'shtyi iiméj wala peeygājna jyucaysaty pechcanamée yajcyna fi'nzete', wala wecha yuja'. <sup>8</sup>Jesucristova ma'wēga peeygāj tyā'wēy andyva i'cue'shtyi jyucaysaty iiméj wala peeygāani's Dyusa' jiaa'. <sup>9</sup>Tyāasatj i'cue'sh pa'gate Dyus yacj puuty we'wena pēyi' peeygāawa'ja's jweeírráa wala ji'pjurra ma'wē fi'nzewa'ja'sva wala ew jii quïjte yujva jypumbacajmén, <sup>10</sup>cyaj maa ewstateva jiyurra tyā'srráa tyjityjrra Dyus dyi'pte ew fi'nzeya' ājāne'cue. Atsa' tyā'wē fi'nzerra'. Cristo quīi ente' wej yujva yuuwe meesa yuune'cue. <sup>11</sup>Tyā'wē yuucajn Jesucristo' jweeírráa wala pu'chjina, i'cue'sh ew yūuna fi'nzete' Dyusa' jweeírráa tuutje'jni yuucajn.

**Andy ityĩ fi'nzeni' jyuca Cristo jii yuurrá'**

<sup>12</sup> Yacjtjê'ljwe'sh jiyucajn pta'shya'vatj: andya's na'wê carcelte úswalj en pa'cj nava tyāa yu' jweeírráa Dyus yuwe's tuutje'cjancu tyā'wê yuu. <sup>13</sup> Tyāa pa'ga soldau jyucaysa maava jyuca jiita' Cristo's selpiipa'garráa preesu ústeva. <sup>14</sup> Atsa' andya' tyā'wê preesu úsrrava Dyus yuwe's úucjmée pta'shitste jiyurra', maa yacjtjê'ljwe'shva tyā'wêy úucjmeety Dyusa's jweeírráa chjächja yajcyna pta'shi'. <sup>15-16</sup> Maaíi yu' andya's atseyajcyrraty Cristo caapiya'jni's pta'shi', andya' preesu yā'j úste', jweeírráa cyūusu'lj wēerra. <sup>17</sup> Naapcachja' vite' andya's pu'chna ew yajcyrraty tyā'wê yū'. Andy yu' preesu úsrrava Dyus yuwe yu'sa' úucjmée pta'shna ústeva jiirraty tyāawe'shva úucjmée ew yū'. <sup>18</sup> Andya's atseyaacysa ma'c yuu cjímeerra' atseyaacysamée ma'c yuu nava Cristo caapiya'jni's maatyva pta'shnirráa ewna. Tyāa pa'gatj andya' wechá'.

<sup>19</sup> Andy pa'gate i'cue'sha' Dyus yacj puuty we'wena úsne'cue, naapcachja' Dyus Espirituva pu'chte', preesu úsrrava ew caseje'nja sūjnatj wala wechá'. <sup>20</sup> Tyāa pa'ga macue preesu úsrrava wej yujva tjaamemée, wejyva Cristo yuurrá's áate tuutje'lj wéetj. Nyafíiva ma'wétca tuutje'je' áchva tyā'wéyrráa yu'nja. Tyāa pa'ga macue andy uuma'tj meerra' uumeema'tj nava Cristo' tuutje'jni nes yuuna. <sup>21</sup> Tyāa pa'gatey naa quiwete andy ityĩ fi'nzenisa' jyuca Cristo jii yuurrá', sa' uurra' Cristo yacj úsya' u'jwal'satj. <sup>22</sup> Tyāa pa'ga ma'sna tyjityj wéerrava ája'tsmeetj, tyā'wê naa quiwete nee fi'nze'tsrra', Cristona selpiina úste', wala ewsaírrá' naa pa'ga. <sup>23</sup> Atsa' tyāa e'nzsaty tyjityjwa'ja' andy yacja' tjēya'. Qui'quinte' uuni wejy ewna Cristo yacj úsya' u'jni sūjnatj yaaqui'. <sup>24</sup> Nava naa quiwete nee ityĩ fi'nzeni wejy jytjaacue peejya' i'cue'shtyi pu'chna úswalj. <sup>25</sup> Tyāa pa'ga naa quiwete nee uumej i'cue'shtyi pu'chna úswalj jii'pjíirráatj, Dyus yacj chjächja fi'nzecajn. <sup>26</sup> Atsa' i'cue'sha' na'wê andya's nee ús jytjáasu'i'cue atsa' Dyus pu'chte' pa'ja'nja, Cristo Jesusa's wechawa'ja's jii'pjucajn.

<sup>27</sup> Cristo caapiya'jnirrá's cytey yuuna mfi'nzewe. Atsa' bagachterráava andy tjengya' pa'jma'tj meerra' pa'jmeema'tj nava Dyusrrá's chjächja yajcyna teehsa na'wérraj jyucaysa Dyus yuwe's pta'shna pa'pchuna ústa' jínirrá's jiyu wéetj. <sup>28</sup> Sa' atsesawe'shtyi ma'wê yujva úucjmée mfi'nzewe. Tyāawe'sha' jyucate vituwa'lsarra' tyā'wê atsetyna, naapcachja' i'cue'sh úucjmée fi'nzesa' Dyus nwe'wenisarra' tyā'wê úucjmeene'cue. <sup>29</sup> Tyāa pa'ga Cristo's jypa'gasa yā'ja' Dyus yacj wét fi'nzewa'ja'srráa wechana jypa'gamée, Cristo's selpiipa'ga naa quiwete tjēyte ñuste fi'nzewa'ja'sva wechana jypa'gawa'ja'. <sup>30</sup> Andyva ma'wétca atseni fi'nze nyafí', sa' áchva tyā'wéyrráa atseni ústju tyā'sa' jii i'cue, atsa' i'cue'shva tyā'wéy andy yacj ja'ndarra'j yajtsena úsi'cue.

**Cristo' äjmeecuesa na'wë yuurrava tjaacue walasa yuuna pa'jni**

**2** <sup>1</sup>I'cue'shtyi na'wëtj yu'cypeje': Cristo peeygāanisa Dyus Espiritu's ūuste ji'pjdyijrra', tyajy cviisha'jni cchjāachja'jni mfi'nzewe, <sup>2</sup>teehsa na'wërraj puuty ya'peeygājna, teehsa na'wërrarrāa yajcyna. Atsa' tyā'wë fi'nzeta' jini's jiyurra', andya' wala wecha'nja.

<sup>3</sup>Iiweych yajcyna peecy wët fi'nzewa'jrrá's yaacywa'jme', wejyva iiweych yajcymée vitesaty jytjaacue tujtjesa' sūjna tyāawe'shtyi ewrrāa yūuna mfi'nzewe. <sup>4</sup>Tyā'wë peecy wët fi'nzewa'jrrá's yajcymée, wejyva vitesaty pu'chna mfi'nzewe ew fi'nzewa'ja's tyāawe'shva jiyucajn.

<sup>5</sup>Cristo' na'wëc yūuya' yajcy tyā'sna i'cue'sh mji'pjuwe: <sup>6</sup>Cristo' Dyusirráac yu', nava Dyus tyacue seena' wala jytujtjesatj sūjwa'j yu'sa' ji'pjumée, <sup>7</sup>tyā'wë yaacywa'ja's jyuca nvijrra cue'sh äjmeecuesa na'wë yuurrac selpiiya' yajcy. <sup>8</sup>Tyāasac äjmeecuesa na'wë yuuna pa'jrra ñus ñus cluuste uuwa'ja'sva ji'pju, Dyusna nwëese'jrra. <sup>9</sup>Tyā'wë yūupa'gac Dyusa' cielun pe'jna u'jrra maateva jytjaacue tujtjesa vitrra qui'p jycaajwa'jsa. <sup>10</sup>Atsa' cielute ūssa vite' naa quiwete ūssa vite' mtee mteewe'shva jyuca Jesus tashterrarrāa peejyūcuerra <sup>11</sup>na'jityna: Jesucristo yuurrāa maateva jytjaacue jycaajwa'jsa' jina Dyusa's wechaatyna.

**Dyusa's jiisa' naa quiwete eena' cweetjna fi'nzewa'ja'**

<sup>12</sup>Andy yacjtjē'jwe'sh yaacynisaty na'wëtj yu'cypeje': i'cue'sh yacj andy cytee ūsra caapiya'jni's wa'lmée i'cue jyuca cytey nwëese'je'. Tyāasa āchja' jweefirráa chjāchja Dyusa's yajcyna meswe, jypumbamée fi'nzewa'ja's pa'pchuna, macue andy yu' jyu'tje ūsteva. <sup>13</sup>Tyāa pa'gatey tyā'wë ew yūuna fi'nzewa'ja's Dyuscu caaūusutje'je', tyajy jytjāasni's cytey yuuna fi'nzecajn.

<sup>14</sup>Quijteva jyuca ewrrāa myūuwe nuywe'wena puiimée. <sup>15</sup>Tyā'wë ewrrāa yūute', quim yujva i'cue'shtyi yuuwesa ewmeesata' jīya' ājāmeetyna, wejyva Dyus luuch yuj yu'ta' yuuwemeesa jīnarrāa we'wetyna, macue naa quiwete nasa ewmeesa cshavyte ūsteva. Atsa' i'cue'sha' eena' cweetjsa na'wë mfi'nzewe tyāawe'sh cshavyte, <sup>16</sup>Dyus yuwe ityī caafi'nze'jwa'ja's mtee mteeva pta'shna. Atsa' naa quiwete Cristo quijte', andya' cyulmeetca pa'pchuna mjii sūjna wët wët yaaqui'nja i'cue'sh tyā'wë ew yūuna fi'nzepa'ga. <sup>17</sup>Tyāasatj ūucjmée mji', macue andy ityī fi'nzeni's iviituwa'j ma'c yuu i'cue'sh pa'gate Dyusna selpiipa'ga, nava tyā'sa' ūucjmée wechana cytey yuuya' ūstju. Tyā'wë andy wechani'stju i'cue'sh jyucaysaty pta'shi', <sup>18</sup>andy na'wëy ūucjmée wechana ūscajn.

**Timoteo vite' Epafrodito yacj caajni**

<sup>19</sup>I'cue'sh ma'wë fi'nzena ūsteva jiyurra wechana ūsya', Dyus pu'chte' Timoteo's dund caja'nja i'cue'shtyi tjengya' sūju'tj. <sup>20</sup>Tyā'wëme', andy

na'wēy i'cue'sh pa'gate pa'pchusa vite yu' ji'pjmeetj. <sup>21</sup>Vite yu' ūsrrava, peecy wēt fi'nzewa'jrrá'styi yaaqui', Cristo Jesus jytjáasni yu'sa' yajcymée. <sup>22</sup>Nava Timoteo' tyā'wē yu'tsme!. I'cue'sha' jiiyā'ji'cue ma'wēga wala selpíi Dyus yuwe's andy yacj pta'sh pu'चना, peecy luuch ma'wē neya's pu'chjicy tyā'wēc yūu. <sup>23</sup>Tyāa pa'ga andya's quíj yūuya'vateva jiyuna'va, Timoteo's dund caja'nja i'cue'shtyi pta'shya'. <sup>24</sup>Meerra' andy yuu i'cue'shtyi tjengya' yujvatsa', sūjrra Dyusrrá'stju neewe'we'.

<sup>25</sup>Yacjtjē'j Epafrodito's i'cue'sha' caajne'cue andy peejinity ctū'se'jrra atsa' ayte ūsa', andya's pu'चना pytjaa yuuna. Atsa' tyā'sva caja'nja sūjū'tj. <sup>26</sup>Tyā'wē tyajy ātsā'ni's i'cue'shva jiyuty jini's wēsē'jrra', tyā' i'cue'sh yacj wala puuty uy wēje'c, tyāasac wala cuj yaaqui'. <sup>27</sup>Isa ātsā'na weterra', uuwa'tjerrāa yā'cj ūsu'. Nava Dyusa' tyā'sa' pu'chcu. Sa' tyā'srrāana pu'chmée, andynava tyā'wēycu pu'ch, na'wē űusna ūstju tyāate jytjaacue űussa pa'cjamén. <sup>28</sup>Tyāa pa'ga tyā'sa' dund caja'nja sūju'tj, tyāa yacj i'cue'sh puuty uyrra' wechana ūscajn. Atsa' i'cue'sh wechana ūste', andyva űusmée wechana ūsu'nja. <sup>29</sup>Tyāa yacjtjē'ja's wala wechana mpa'gawe, sa' tyāa na'wēsatyi's bagachteva mpeeygājwe. <sup>30</sup>Tyāa yacjtjē'ja' Cristo's selpiipa'garrāa tyajy ityī fi'nzeni's iviitu'dyijc, tyā'wē i'cue'sh yu' andya's pu'chya' ājāmeeteva, tyāa yu' andya's selpiina ūsrrac tyā'wē u'dyij.

### Dyus dyi'pte ew fi'nzewa'ja's Dyus írráac ūsu'

**3** <sup>1</sup>Āchja', yacjtjē'jwe'sh, Dyus yacj wechana mfi'nzewe. Nyafíi neewe'wena fi'tj tyā'wēyrrāa āchva neewe'wetstju, i'cue'shtyi' selpiwa'jsa' naa pa'ga. <sup>2</sup>Nasa ewmeesa caypumba'jna fi'nzesatyi's mpa'yajcywe, peecy cacuetewe'sha's spē'tjtsaty. <sup>3</sup>Ew jiyute yu', Dyusa's ūusuj jyuca yajcyrra neewe'wesa cue'sh tyā'wē Dyus luuch circuncidāynisatja'w. Tyāa pa'gatey Cristo Jesus jii yā'tja'w sūjrra wechanatja'w fi'nze' naa pa'ga. Sa' cue'sh ājāni cacuecjēwe'sha's weech yajcyna fi'nze'tsmeetja'w. <sup>4</sup>Tyāaty yaacy wēevats yu', andyva weech yajcyya' āja'nja, quimteva jytjaacuesatj naa pa'ga. <sup>5</sup>Andy āaga yuuni ocho en yuutspachja', circuncidāynisatj. Sa' Israel nasatj, Benjamin ji'tj. Sa' mama tutyju casejii hebreo nwe'shtju yu', tatawe'sha' judiuty yu' tyāa pa'ga. Cjirrava andya' fariseotj yu', judiuwe'sh ley ma'wē jycaatjeva jyuca cyteytju yuuna fi'nzesa yu'. <sup>6</sup>Tyāasatj ley caapiya'jni's nwēese'jna Cristo nasatyi's icjya' pacué', Dyusna selpiitstju sūjrra. Atsa' andya's quim yujva ley jycaajni's cytey yuume' jīya' ājāmeetyna.

<sup>7</sup>Nyafíi yu' tyā'wēsa' andy yacja' seena' yuj wala ewsa yu'ty. Nava āchja' Cristo's jypa'ganijū' tyā'wēsa' quíjte yujva seelpimeety yuuna pa'j. <sup>8</sup>Āchja' Cristo Jesusna ew jiyuwa'j wejy jytjaacue wala ewsa', naa pa'ga tyā'wēsatyi' jyuca nvijtrratj fi'nze'. Cristorrá's selpiina fi'nze wēerra quíjquínava jyuca nvijttju seelpimeesatyi's, tyāa yacj yuurráa fi'nzeya'. <sup>9</sup>Tyā'wē ley jycaajni's cytey nwēese'jrra ew fi'nzewa'ja's ji'pjmeetj.

Tyā'wē ew fi'nzewa'ja's Dyuscu ūs, Cristo's ūusuj jyuca yaacya'ga.  
 10 Tyāasa Cristo yuurrá's ew jiyurra tyāa ma'wēne! uurra qui' ityī yuu tyā'wēy yuu wēetj. Sa' tyāa na'wēy pytjaa yuurra uuwa'jnava ji'pjurra,  
 11 uunijūva qui' ityī yu'nja sūjū'tj.

### Dyus dyi'pte ewsa yuuna pa'jwa'ja's pacuena nes yuuni

12 Tyā'wē Cristo's jyuca jiiyā'tj jī'tsmeetj, sa' Dyus dyi'pte ewsayā'tj sūju'tsvameetj. Nava tyā'wē yūuwa'ja's ājā'nja sūjnarráatj pa'pchuna nes yu'. Cristo Jesusa' andya's tyāa jīic vitna pa'j atsa' āchja' andya' Cristo jīitj sūjnarráatj pa'pchuna fi'nze!. 13 Yacjtjē'jwe'shtyi na'ji'tj na': Cristo's jiyuwa'j peejírráatj sa' Dyus dyi'pte ew fi'nzena pa'jwa'j peejírrá' sūjū'tj. Atsa' tyāaty cytey yuu wēerra na'wētj yū': nyafii fi'nzeni's pechcanarra, na'wē jiyuna jyā'jwa'j ūsta' tyāarráaty'tju wejy pa'pchu'. 14 Tyāaty jyuca ew jiyuna pa'jrra', Cristo Jesus tashte ūsya' Dyus pa'yac cytee ūsu'nja sūjū'tj.

15 Dyusa's ewyā'j jiisa' jyucaysa na'wē pta'shi'tj tyā'wērrarráa yaacywa'j ji'ptja'w. Meerra' jypumbavá'cue nava Dyusa' ew áate caajiyu'juna.

16 Na'wē Dyus yacj ew fi'nzewa'ja's jiiyā'tja'w tyā'sa' pechcanamée cytey yuuna fi'nzewa'j ji'ptja'w.

17 Yacjtjē'jwe'sh, andy na'wēy mfi'nzewe. I'cue'shtyiva ma'wēta'w caapiya'j tyā'wēy vite yacjtjē'jwa ūsta' ew fi'nzesa, atsa' tyāawe'sh na'wēy mfi'nzewe. 18 Wala cujus iipta'shyā'tj, nava qui' peena pta'shitstju ū'nena: maafii yu' Cristo cluuste uuni's atsesa ūsta'. 19 Tyāawe'sha' ū'wa'ja's yuurráa dyus na'wē yajcyna fi'nzesata', sa' tjaamewa'ja's yaaquipcachte tjaampa'su yu' iivejch yaacysarráata'. Nava nmejte' jyuca iviituni yuutyna. 20 Naapcachja' cue'sh yu' cielute ūswa'lsatja'w. Tyāasa ūytjasna ūstja'w, cue'shtyi nwe'wesa Jesucristo cielujū quiijana sūjna. 21 Tyā' cue'sh cacue seelpimeesa's yu'ptjejrta, tyajy cacue na'wēy ewsa vituna, Cristo' ma'wē yūuwa'ja'sva jyuca ājāwa'jsa' naa pa'ga.

### Pejca Dyus yacj yuurráa wechana mfi'nzewe

**4** 1 Andy yacjtjē'jwe'shtyi yajcyte', wala wecha yuja', Dyus yuwe's jiyurra jypumbamée ūste!. Atsa' i'cue'shtyi wala peeygājna neewe'we'tj: Dyusna pechcanamée chjāchja yajcyna meswe.

2 Evodia vite! Síntique tyāawe'sha' e'nzī Dyusa's ūuste jypa'garra fi'nzetsrra', puiimée fi'nzeczajntju neewe'we!. 3 Sa' tyāa e'nz u'lytyi's yu'cypejcajn indyna neewe'wetstju, andy yacj mjii pu'chna u'jusang naa pa'ga. Tyāa e'nz u'ywe'sha' nyafíia' andy yacj Dyus yuwe's wala pta'sh pu'chtyi, Clemente vite! andy yacj mjii pu'chsawe'sh yā'jrta. Atsa' tyāawe'sh yase' fil'jni yā'j ūsta' bagachte yujva uuwa'jmée ityī fi'nzewa'j libruete.

4 Dyusna chjāchja yajcyna fi'nzetsrra', wech wecha yajcyna mfi'nzewe. I'cue'shtyi peena neewe'wetstju, wech wecha fi'nzeczajn. 5 Cyaj maava

i'cue'sh ew yūuna fi'nzeni's jiyucajn, i'cue'sha' Dyus yacj ew fi'nzewal'j yuurrá's pa'pchuana meswe, Cristo quíiwa'ja' ájatsyá'ja' naa pa'ga.

<sup>6</sup>Wej yujva ñusmée, wejyva Dyusráana neewe'wena meswe. Quíj peejyrava, tyá'sna jyuca mpéjywe wechana. <sup>7</sup>Tyá'wē yūute!, Dyusa' ūsuna ūuste wēt yaacywa'j seena' walasa's. Atsa' ūuste wēt yaacywa'ja's jypa'gate!, wala yuj wecha yuja!. Tyá'wē Dyus ūsni ūuste wēt yaacyni's ew áate pta'shya' ya'ája'tsme!, tyá'wē seena' walasa pa'ga. Tyā wēt yaacywa'ja's jypa'gasayá'ja', Cristo Jesus yacj wētráa yajcyna fi'nzene'cue.

### Dyus dyi'pte ew fi'nzewa'jrrá's yajcyna fi'nzeni

<sup>8</sup>Yacjtjē'jwe'sh na'wē yajcyna fi'nzeczajn neewe'werra nmej nviitutstju: quíjquíjva i'cue'sh ūuste suwwa'jsamée ew Dyus dyi'pte caafi'nze'jwa'jsa yuurrá's mpa'pchuwe, íshimée isasarrá's we'wena, ewrráa yūuna quíjteva jypumbamée. <sup>9</sup>Andy caapiya'jnity ūusuj jyuca jypa'garra ūsra' tyáatyí' cytey yuuna mfi'nzewe. Andy ma'wē jycaajrra' qui' ma'wēne'tca yūuna fi'nze tyáatyí' tyá'wēy myūuwe. Atsa' i'cue'sh ūuste wēt yaacywa'ja's ūssa Dyusa' i'cue'sh yacj nes yuuna.

### Filiposwe'sh Pablo's ofrenda peesni

<sup>10</sup>I'cue'sha' andya's qui' yaacypa'ga andya' wala wecha'tj. Nyafí' pechcanane'cue sūjrra tyá'jí'tsmeetj. Tyá'wē pechcanameerrava pu'chya'rráa ne'cue ájámée ūsu' sūjū'tj. <sup>11</sup>Quíjva jí'pjmée peejiinatj ūsu' jírra tyá'jí'tsmeetj. Tyā pa'gatey andya' piyatj quíjcuē jí'pjuni yacjrráava wechana fi'nzeya!. <sup>12</sup>Quíj yujva jí'pjmée fi'nzeni's jii'tj, sa' wala jí'pj fi'nzeni'sva jii'tj. Tyic ūswa'j ma'c yuu meerra' wēena fi'nzewa'j ma'c yuu nava ma'wē fi'nzewa'j en pa'tjeva maa sūjmée ūsya'tj piya. Quíjva pejiima'tj pejiimeema'tj nava tyá'wē fi'nzewa'ja's jyuca piyatj. <sup>13</sup>Tyā pa'gatey naa quiwete macue wala tjēysa ñussa pa'tjeva, Cristo yuurráac pu'chna nes yu', chjächja caafi'nze'jna. <sup>14</sup>Macue tyá'wēteva, i'cue'sha' ew i'cue yūu, andy peejiina fi'nzeni's pu'chna.

<sup>15</sup>Andy nyafyrraj Macedoniasu Dyus yuwe's pta'shya' u'juetste!, andya's quim yujva pu'chmeeteva, i'cue'sh yuurráa i'cue andy peejini's pu'chna caaj, andya' i'cue'shtyi caapiya'tj Dyus yacj fi'nzewa'ja's naa pa'ga. <sup>16</sup>Sa' andy Tesalonicate nee ūsiyna i'cue'sha' qui' vyyu caaji'cue andy peejini's pu'chna. <sup>17</sup>Tyá'wē andyna quíjrráava peeste!, tyá'sna jypa'gawa'jrrá's yajcyna fi'nze'tsmeetj, wejyva tyá'wē yūupa'ga Dyusa' jweeírráa wala peesuna i'cue'shtyi's sūjnarráatj yaaqui!. <sup>18</sup>Epafrdito yacj vyyu caacjue tyáarráa andy peejinite jytjaacueyá'ja'. Tyā peesya' caajnisá' Dyus dyi'pte iiméj wala ewsa yu'c, Dyusa's wechana peesnisá ne' yu' naa pa'ga. <sup>19</sup>Atsa' andy Dyusa' i'cue'sh quíj peejiina ūsteva, jyuca ūsuna pejiicajmén, tyā pa'gatey Cristo Jesusa's jypa'ganijū' Dyus jíi yu'sa' quíj yujva peejymée

jyucac ya'jypa'ga'. <sup>20</sup>Tyãa pa'ga cue'sh Tata cielute ùssa's wechana nes yuuwa'ja' bagachteva.

**Dyus luuch jyucaysaty yuwe wechaa caajni**

<sup>21</sup>Dyus luuch jyucaysaty yuwe mweechawe, Cristo Jesus yacj fi'nzesawe'shtyi. Tyã'wëy andy yacj ùssa yacjtjè'jwe'shva yuwe wechaa caja'ty. <sup>22</sup>Sa' Dyus luuch Cesar tashte selpiina ùssava jyucaysa yuwe wechaa caja'ty.

<sup>23</sup>Cue'shtyi jype'jsa Jesucristo' i'cue'shtyi' pu'chjina ewrráa caafi'nze'jna.